

1866
LETTRE

D'VN

GENTIL-HOMME

A LA

REYNE.



A PARIS,
Chez la Veufve THEOD. PEPINGVE', & Est.
MAYCROY, ruë de la Harpe, vis à vis
la ruë des Mathurins.

M. DC. XLIX.

LETTRE

D'UN

GENTIL-HOMME


A LA

REYNE



A PARIS,
Chez la Veuve THOD-PERINOT, & Co.
MAYENOT, rue de la Harpe, vis à vis
la rue des Mathurins.

M. D. C. XLIX



LETTRE

D'VN

GENTIL-HOMME

A LA

REYNE.

MADAME,

Vostre Majesté par vne serieuse reflexion sur les malheurs que les desordres & la confusion causent aujourd'huy à la France, peut aisément par vne action digne de la vertu d'une grande Princesse rendre ce Royaume tranquille, & remettre la Regence dans l'estime & la reputation que les plus gens de bien la desirent. Il n'est pas question, Madame, de vous relâcher de ce qui est deub à Vostre Autorité, il s'agit seulement d'oster vn sujet odieux au public, & d'esloigner vn homme, qui n'a pas merité l'honneur de vostre protection. Considerez, Madame, dans quelles extremitez Vostre Majesté est à la veille d'entrer pour le vouloir maintenir, & combien de blasme elle s'attirera de preferer vn particulier que les loix banissent, & contre lequel tout le monde est souleué, aux obligations de

la Nature vers le Roy vostre Fils, & à celles de vostre deuoir, particulièrement en ce qui regarde vostre conscience, qui sera responsable d'une guerre funeste, qui reduira cét Estat dans vne totale dilipation. Lors que Vostre Majesté l'a choisi pour l'establiir premier Ministre, ç'a esté avec vne intention si pure, qu'elle ne scauroit estre accusée de s'y estre legerement resoluë, puisqu'elle auoit iuste occasion de se promettre d'estre soulagée par ses soins, & fidelement seruie dans la conduite des affaires: mais comme il n'appartient qu'à Dieu de ne se mesprendre point, & auquel toutes choses soient presentes, elle ne doit pas trouuer estrange, de n'auoir peu penetrer dans les secrets de l'aduenir, s'en estant voulu reseruer à luy seul vne parfaite connoissance. Ce que la prudence humaine peut d'elle mesme, Madame, c'est de ne se point obstiner dans vne conduite, que l'experience fait paroistre dangereuse, si elle est plus long-temps tenuë capable de causer vn bouleuersement general, qui sera plus attribué à Vostre Majesté qu'à tout autre, parce qu'il despend absolument de vous de l'euitier. La Reyne Catherine de Medicis, qui auoit la mesme place que vous occupez dans cette Monarchie, en a conserué la grandeur en s'accommodant au temps, desirant tousiours les choses iustes, sans s'attacher à celles qu'elle preuoyoit impossibles, ou qui ne pouuoient s'establiir que par le sang, & les autres violens moyens pour lesquels il n'y a pas lieu de douter que vous n'ayez vne extreme repugnance. Examinez, Madame, combien de fois cette sage Princessé s'est employée par les voyes de la douceur & de la moderation, si conuenable à son sexe, pour appaiser les troubles que l'ambition des Princes, & la legereté des peuples auoient esmeus contre son gouvernement. Vous la deuez plustost imiter, Madame, & suiure l'exemple d'une Reyne estrangere, comme l'est Vostre Majesté, dont la prudence s'est demeslée avec honneur de tant de fascheuses difficultez, que de vous laisser conduire dans vn precipice certain par des conseils qui ne sont pas moins accompagnez d'ingratitude, qu'ils sont creus interessez par ceux qui les considerent sans preuention. La feu Reyne Marie se declara ouuertement ennemie du Cardinal de Richelieu, estant persuadée par

des

3
des raisons legitimes que son administration degeneroit en tyrannie, & sur ce qu'il vouloit s'en servir pour eslever sa fortune particuliere au prejudice des Loix, qui ne peuuent souffrir de semblables vsurpations d'un sujet à la diminution de la dignité souveraine, elle fust persecutée par sa creature. Infailliblement, Madame, vous ne ferez pas exposée à de moindres traverses, si vous prenez avec trop d'attachement les interets de la vostre, qui vous est beaucoup plus redevable des avantages qu'il vous a pleu de luy procurer, si fort au dessus de sa naissance, & si disproportionnées aux qualitez que chacun reconnoist en luy. Affectement, Madame, vne plus longue perseverance seroit prise pour un aveuglement qui vous attireroit un jour de sensibles remords, & un eternal reproche: car des actions des personnes telles qu'est Vostre Majesté, le temps n'en efface jamais la memoire; La vostre, Madame, vous fera ressouvenir du desplaisir que cette mesme Reyne vostre belle-Mere receust sur le sujet du Marechal d'Ancre, de la mesme nation qu'est le Cardinal Mazarin, qui gouverne à present: Les Princes formerent un party qui triompha de son orgueil & de sa vie, leurs desseins n'estoient pas appuyez sur un si iuste fondement, ny de la plus celebre Compagnie du monde, d'un Parlement qui a tousiours si bien merité de cette Couronne, & duquel la prudence & les signalez & importans services joints au pouvoir que les Roys luy ont attribué, rend les Arrests irreuocables. Vous sçavez, Madame, ce qu'il a prononcé, & que les Princes qui se sont vnis à luy pour empescher qu'il ne soit opprimé, ne sont point des esprits factieux: mais de fidels tesmoins des sincerest intentions de cet illustre Corps, qui a si candidement procedé dās toutes les Conferences, que l'on doit dire à son honneur, qu'il a gardé inuiolablement sa foy, lors que vostre Ministre obseruoit si mal la sienne. Il est vray, Madame, qu'il ne s'en faut pas estonner, puis qu'il n'y a homme vivant qui puisse se vanter qu'il luy aye tenu aucune des paroles qu'il a données, ny receu aucune grace qui n'ait esté mercenaire, ou que la necessité, ou la crainte n'aye exigée de luy. Il auroit deu estre content de s'estre comblé de richesses aux despens de ce Royaume, & Vostre Majesté de l'avoir sou-

fert pour n'en estre pas informée, sans qu'il en procure la
 ruyne par la diuision qu'il y a introduitte : Vostre Majesté se
 feroit vn tort irreparable, si elle en tolleroit plus long temps
 la durée : La guerre estrangere est continuée, parce qu'il ne l'a
 pas voulu finir, elle est perilleuse sans doute, la fortune ayant
 des reuers qu'il est difficile de preuoir, & quasi impossible d'en
 destourner les effets ; mais il est asseuré & vniuersellement
 creu, que ce n'est pas à comparaison de la ciuile, qui deschire
 vn Estat dans toutes les parties qui la composent. Iugez, Ma-
 dame, par la resolution de l'Angleterre de ce que vous auez à
 redouter en ce Royaume, qui n'en est separé que d'autant de
 distance qu'il en faut pour plaindre leurs disgraces sans y par-
 ticiper : profitez des mal-heurs qu'ils espreuent, pendant que
 les iustes mescontentemens des subjets du Roy vostre Fils,
 ne sont point encore meslez des factions qui peuvent naistre,
 ny des pensées que les succez font ordinairement conceuoir à
 des esprits ambitieux, irritez par de longues souffrances. L'ar-
 mée qui est presté de s'opposer à celle qui soustient & deteste à
 mesme temps l'autorité du Cardinal Mazarin, est compotée
 de prisonniers Illustres par leur vertu, qui ne leur a iamais per-
 mis d'estre esclaués de son credit, pas mesmes dans les plus
 noirs cachots où ils ont esté retenus. Ils sont animez contre luy,
 Madame, mais c'est par vn principe qui doit estre generale-
 ment approuué, puisqu'il a pour objet le salut de la Monar-
 chie, que son ignorance & ses meschantes intentions mena-
 cent à tous momens d'vne cheute ineuitable. Sera-il possible,
 Madame, que vous puissiez encore souffrir vn homme hay de
 toute la terre, qui a conuertiy les benedictions, & les acclama-
 tions publiques que vous receuiez au cōmencement de vostre
 Regence en des murmures continuels, qui marquent cōbien les
 cœurs sont alienez des sentimens qu'ils auoiēt pour vostre Ma-
 jesté. Vn moyen asseuré, Madame, pour que vous soyiez éclair-
 cie quelles sont les inclinations du Cardinal Mazarin, c'est que
 vous consideriez ceux ausquels il se confie, & les personnes qu'il
 rejette, & vous trouuerez que ses partisans sont des gens cor-
 rompus & sans merite, & que les autres qu'il ne veut point
 approcher, ne luy sont indifferens ou desagreables, que parce

que la vertu dont ils font profession luy est si odieuse, qu'il ne la peut souffrir : Sa fausse gloire & son avarice ont paru dans quantité de rencontres ; mais jamais dans aucune qui les aye plus fait remarquer que dans l'entreprise de Naples ; la conquête en estoit aisée, s'il eust voulu assister Monsieur de Guyse de forces & d'argent, ce qui luy estoit tres-facile ; mais son dessein en estoit bien esloigné : car il ne vouloit pas qu'il eust l'honneur de vous rendre ce service, ny à l'Estat, ny qu'il en receust la recompense, iugeant qu'un homme de sa maison estoit bien plus digne que luy de cet employ ; & peut estre il se flattoit de cette esperance de paruenir à vne Couronne qu'il s'imaginoit pouuoir soutenir de ce qu'il auoit si impunément volé à celle du Roy vostre Fils. Il est constant & sçeu d'une infinité de personnes de toutes conditions de quelle nature a esté son commerce, & les sommes immenses qu'il a gaignées, tant sur l'armement que sur la vente des bleds conduits de France en Italie : dans la Cour celle des charges qu'il a eues : les profits des comptans, & la part qu'il a prise dans tous les partis, qui ont esté si excessifs, que le Royaume en est tellement appauury, qu'il est reduit dans la derniere misere. Et parce que le Parlement s'est opposé à semblables abus, comme son deuoir l'obligeoit, il a conceu contre luy vne haine mortelle, & si ses pernicieux desseins eussent eu leur effet le iour du *Te Deum*, d'une victoire qu'il est indigne de partager avec la valeur de Monsieur le Prince, auroit esté celuy du sacrifice de la plus saine partie de ceux qui auoient si genereusement resisté à la tyrannie. Monsieur de Chauigny auroit aussi esté soumis à sa violence peu de temps apres, si les voyes qu'il auoit tentées de le perdre luy eussent succédé selon qu'il le pretendoit ; estrange mesconnoissance, Madame, des obligations toutes extraordinaires dont il luy estoit redevable. Entrez en vous mesmes apres tant de lumieres, & n'y perdez point de temps, puisque tous les momens vous sont si chers ; N'attendez point qu'en aye recours à la fureur des armes dans tous les endroits de ce Royaume, & que le sang y soit respandu par la courageuse resistance d'un party qui hazarderoit milles vies pour vne cause si iuste contre celuy qui en voudra deffendre

vne aussi mauuaise que celle du Cardinal Mazarin. Enfin, Madame, vn nombre infiny de malheurs arriueront pour l'interest d'un seul homme, si vous n'avez agreable d'y pouruoir: & la destinée de l'Estat despendra, si vous n'y remediez promptement; d'une iournée fatale à la France, qui en ouurira la conqueste aux Estrangers, ausquels l'on est bien aduertiy que le Cardinal a desia offert des conditions tres-aduantageuses, pourueu qu'ils vueillent luy donner le temps de saccager la plus belle ville du monde, capitale d'un Royaume, duquel il est estranger & l'ennemy déclaré, comme ses actions le tesmoignent. La paix, Madame, vous la deuez, puisqu'elle est entre vos mains, & la commencer en esteignant le feu de la guerre ciuile par l'estoignement du perturbateur du repos public. Vostre propre vertu vous conuie d'accorder vne demande si equitable, qui ne sçauroit estre refusée de Vostre Majesté, sans ternir sa reputation, & charger sa conscience des meurtres, des embrasemens, & de la prophanation des choses les plus saintes, & les plus sacrées. Je prie Dieu que ce fidel Aduis escript sans aucun interest que celuy de vostre gloire, & du desir de satisfaire au deuoir d'un homme de bien, touche le cœur de Vostre Majesté, à laquelle ie ne sçauois rendre de tesmoignage plus asséuré du zele que i'ay pour son seruice, qu'en luy disant des veritez si importantes. Je suis,

MADAME,

De Vostre Majesté,

Le tres-humble, tres-obeissant, & tres-fidele sujet & seruiteur.

RBC
NcJ